



Armin Caviezel e Leo Derungs ein segidai da trer si il zenn da 625 onns.



Il zenn pign verga gest l'ura baselgia, en paucas secundas eis el en clutger.



Il zenn penda vid la suga culla schirella d'itschal. Vid il zenn ves'ins treis tacs neiv.

FOTOS A. BEEI

## Il zenn da Vrin ei anavos

DAD AUGUSTIN BEEI / ANR

■ El clutger dalla baselgia parochiala da Vrin penda puspei quater zenns. Ier han ils montaders returnau al clutger il zenn pign da 625 onns. La stad vargada havevan habitonts da Vrin fatg attent ch'il zenn pign tuocava buca pli. In'utaga ha mussau ch'il fier che tegn il battagl fuva rus giu. Sin Nadal ei il tuchiez dalla baselgia parochiala puspei cumplets. Avon treis meins ei Jeremias Wicki, montader dall'interpresa MuriBär

da Buron el cantun Lucerna, viagiava a Vrin cull'incarica da transportar en Svizra centrala in zenn particular. La pleiv Lumnezia ha buca vendiu quel, igl ei buca in zenn sco tschiens auters. El clutger dalla baselgia parochiala da Vrin han els pendiu giu il zenn pign ch'ha uonn exact 625 onns. Il zenn ei viagiava da Buron ora el Tirol tier la cularia speciala Grassmayr. Suentar ch'ins ha culau el tschiel dil zenn in niev crutsch e remplazzau il battagl cun in niev sa el ademplir vinavon siu survetsch entadem la Lumnezia.

Tenor l'inscripziun gotica ha «magister Anoriolus de Lugano» culau quel zenn igl onn 1394, las cefras MCCCXCIII tradeschan quei.

Dapi ier tuoca il zenn puspei. Cul niev battagl ch'el ha survegniu savess ei esser ch'ureglas attentas constateschan ch'igl ei in tun pli lom che quel d'entochen ussa. Ins ha buca fatg in beinvegni spectacular al zenn pign, ei ha era buca dau plaid festivs, musica e tschupials. Pils montaders dalla MuriBär eis ei stau ina montascha sco biasas autras. Tutina ha Wicki conce-

diu ch'el eses collegas hagen giu in grond tschaffen dil zenn da Vrin. Fetg darar survegnien els en luvratori in zenn gotic da 625 onns. Armin Caviezel e Leo Derungs, commembers dalla suprastanza dalla pleiv Lumnezia, ein stai presents cu il bus pign dil cantun Lucerna ei arrivau culla carga speciala. Els ein segidai da trer si en clutger il zenn da 170 kilos. Aposta per mussar la stema che l'interpresa ha giu pil zenn historic han ils luvvers tschentau quel sin in palet ch'ins aveva enzugiau cun ina teila cotschna da vali. Tenor il

motto «bein preparau ei miez luvrau» han Wicki e siu collega semtgau enteifer in'ura il plaz da montascha. Cun sugas, duas stangas da fier e la schirella automatica han els lu alrau siadora il zenn, enteifer treis minutas han ins giu finiu l'etappa dil trer si il zenn. Suentar han ils luvvers colligiou il vegliuord cun tschels treis zenns. L'aura ei stada favoreivla per quell'aziun el clutger baroc da 30 meters. Il stemprau da favugn ei setenius anavos ed ha spigau in miez giu cun bufar vehementamein tras Vrin.

### Publicaziun en La Quotidiana dils 17 da december 2019



Ils luvvers dalla MuriBär han zugliou il palet da transport dil zenn en ina teila cotschna da vali.

FOTO A. BEEI

### Stema per in zenn

■ (anr/abc) Ier han ils montaders returnau al clutger dalla baselgia parochiala da Vrin il zenn pign da 625 onns. Sin Nadal ei il tuchiez dalla baselgia da Vrin puspei cumplets. Suentar ch'ins ha culau el tschiel dil zenn pign in niev crutsch che tegn il battagl sa el ademplir vinavon siu survetsch entadem la Lumnezia. Tenor l'inscripziun gotica ha «magister Anoriolus de Lugano» culau il zenn pign igl onn 1394, las cefras MCCCXCIII tradeschan quei. Ins ha buca fatg in beinvegni special ad el, senza plaid festivs, musica e tschupials. Ina benedicziun

ha ei buca duvrau, lezza han ins fatg avon 625 onns. Jeremias Wicki, montader dall'interpresa MuriBär, ha concediu ch'el e ses collegas hagen giu in grond tschaffen dil zenn da Vrin. Fetg darar survegnien els en luvratori in zenn gotic. Armin Caviezel e Leo Derungs, commembers dalla suprastanza dalla pleiv Lumnezia, ein stai presents cu il bus pign dil cantun Lucerna ei arrivau culla carga speciala. Els ein segidai da trer si en clutger igl object da 170 kilos.

> PAGINA 5